

豫

章

焚

書

第一冊

幾

年

幾

書

卷一百一十五

曲阜集

己未仲夏刊
於南昌退廬

欽定四庫全書總目卷一百五十三

集部

別集類

曲阜集四卷

浙江鮑士恭家藏本

宋曾肇撰肇字子開南豐人鞏布之弟也治平

四年進士官至中書舍人龍圖閣學士以元祐

黨籍貶濮州團練副使汀州安置崇寧中復朝

散郎歸潤州而卒紹興初追謚文昭事蹟具宋

史本傳肇行狀載所著曲阜集四十卷外集十

卷奏議十二卷邇英進故事一卷元祐外制集

十二卷庚辰外制集三卷內制集五卷尙書講

義八卷曾氏譜圖一卷楊時所作神道碑曲阜

集奏議目次並與行狀同而西掖集十二卷內制五十卷外制三十卷則與行狀稍異明永樂十年其裔孫刊行奏議曾棨爲序有茲特曲阜集中一卷尙當爲刻全文之語則明初原集尙存其後乃漸就散佚傳本遂絕國朝康熙中其裔孫儼等取所存奏議益以詔制碑表諸逸篇掇拾編次別爲此集前三卷皆詩文後一卷則附錄也肇立朝有守屬黨論翻覆以一身轉側其間往往齟齬不合又嘗力諫其兄布宜引用善類而布不從所上奏議如乞復轉對宣仁皇

后受冊百官上壽救韓維繳王覲外任諸篇皆
爲史所稱述今並在集中可以考見大概其制
誥亦爾雅典則得訓詞之體雖深厚不及其兄
輦而淵懿溫純猶能不失家法惜其全本已亡
掇拾多有未盡如進元豐九域志表爲肇所撰
見於王應麟玉海而集中亦無之則其佳文之
散失者固不少矣

刻文昭公奏議叙

公所著書十數種種數十卷奏議其一也公治平中
舉進士歷官中外有聲會修仁英兩宗正史進史館
已擢起居舍人慨然以讜論自任繇太后柄臣與夫
郊禋大典國故民艱率引經執義軌諸道而止故當
時直聲震朝野屹爲三朝刑範而奏議亦以大行於
世宋而下宇宙凡幾大變書闕有間矣思孔大懼久
且益湮乃從先代所貯叢書中得公遺奏議若干篇
釐爲上下集諸詔誥制表文若詩附焉繕寫竟付之
梓以示將來嗚呼公獨以文垂世哉踐更數州則聞

澤覃布史稱公儒者有能吏才冠宋中葉而龜山楊氏推公前輩風流慎重得大臣體豈所謂在國美俗在朝危行者邪獨慨公著述甚繁弗獲盡流於後使覽遺編者睠焉不勝散佚之感是爲恨耳公之兄舍人公元豐稿世多傳之乃隆平一書先人珍襲頃嘗出而刻焉公爲孔自出祖顧無能博採全書紹而明之豈書之傳亦有數耶刻成聊紀其概用寄祖德之思云

萬厯己亥春十九世裔思孔頓首譔

曲阜集目錄

卷一

奏議十首

卷二

奏議十三首

卷三

詔二首

制十七首

表九首

啟四首

卷四

碑二首

記二首

序一首

墓誌銘二首

祭文三首

論一首

詩十六首

曲阜集卷一

宋 南豐 曾肇 著

奏議 自元豐八年至元祐七年

上哲宗皇帝乞復轉對

臣伏觀令文臣下得言時政闕失公私利便者臣聞帝王卽位之初必有以順天下之心答中外之望其爲之有序在知其要而已伏惟皇帝陛下仰承顧命而履天下之尊太皇太后陛下俛徇權宜而議軍國之務此正華夏蠻貊洗心注目顙顙視聽之時也端本謹始實在今日臣愚輒不自揆敢布腹心伏惟留

神聽察幸甚臣伏覩先帝嗣位以來憂勤恭儉日謹
一日神功聖德充塞天地固非臣言所能髣髴也陛
下繼之承之任大責重然四海之廣萬事之煩億兆
之衆不可家至而人接之則欲達天下之情成天下
之務豈有他哉在廣言路爾言路廣則人人得盡其
情人人得盡其情則上無不聞之事下無不通之志
政令之得失百姓之休戚羣臣之忠邪賢不肖雖在
四方萬里之外陛下不出戶庭不降几席可以周知
而備見矣然後察政令之得者則力行之彌綸未至
者則損益之百姓之所願欲則與之百姓之所疾苦

則除之顯忠而去邪任賢而退不肖夫然故上澤得
以下及下情得以上聞百官有司奉法遵職貴者不
以崇高而敢肆賤者不以疎遠而敢欺陛下深處法
宮之中端拱無爲而天下治矣夫任已聰明則其察
愈詳其蔽愈甚因衆之聰明則所視者遠所聽者周
故先王設進善之旌立敢諫之鼓陳誹謗之木又使
瞽獻書師箴瞍賦蒙誦工諫近臣盡規親戚補察彼
豈聰明之不足哉知任已不如任衆也舜之繼堯所
守一道然舜初受命則闢四門明四目達四聰以謂
繼治世者耳目尤不可以不廣故也三代以還咨詢

訪納固非一途然近臣之所當行祖宗之所已試則
命百官轉對實今日之要務也昔唐太宗初卽位延
見羣臣或論往古成敗或究民間利病每言及稼穡
艱難則上下相規務遵勤儉言及閭閻疾苦則君臣
感嘆議息征徭故能創業垂統成貞觀之治下至代
宗每于紫宸聽朝常限三人奏事敢言者賞其盡規
不言者責其隱默故陸贄以謂諫雖不從且不深忤
情苟有阻終獲上通周世宗卽位之始亦延羣臣使
陳當世之務故能外絕兵威內修政事而顯德之政
獨高五代先帝熙寧之初亦詔百官咸以次對故事

不遠行之非難此臣愚惓惓所以有望于陛下也今
學士大夫布滿周行人有所懷皆願自竭但慮詢求
之未廣聽納之未至爾陛下沛然發德音下惻怛之
詔使之極言無有忌諱夫孰不踴躍奮勵各罄所知
以補聰明之萬一哉陛下察其言之當者納之用之
而勸之以賞言而未當或過于訐直者寬裕包涵而
不加以罪非但舉虛文循故事而已如此則四海之
內知陛下有好問之美有聽言之實忠謀讜論日聞
于上而阿諛壅蔽之私不得行矣天下之情孰有鬱
塞而不伸天下之務孰有怠廢而不起者哉故臣愚